

四庫全書

集部

欽定四庫全書

集部

東維子集卷二十四

詳校官中書臣孫衡

中書臣劉源溥覆勘

總校官進士臣繆琪

校對官編修臣莊通敏

謄錄監生臣王茂源

欽定四庫全書

東維子集卷二十四

元 楊維禎 撰

神道碑

元故中奉大夫浙東尉楊公神道碑

公諱瑀字元誠姓楊氏系出漢震後五世祖某自婺遷
杭遂為杭人祖榮祖宋承信郎鎮江都統司帳前提舉
父昌宋邳州萬戶府經歷今贈奉議大夫樞密院判官

驍騎衛追封錢唐縣子公生而警穎長而玉立長身紫
髯如畫天歷間自奮如京師受知於中書平章政事沙
刺班大司徒之父文貞王偕見上於奎章閣論治道及
藝文事因命公篆洪禧明仁璽文稱旨使備宿衛署廣
成局副使特賜牙符珮出入禁中寵遇日渥擢中瑞司
典簿繼改廣州路清遠縣尹上愛其廉慎有深沈之思
留之嘗謂廷臣釋迦班曰楊瑀有謀事必咨之行時秦
王伯顏柄國一日挾太子縱獵上林上默旨竄陽春惟

資公密謀禁近臣皆不預聞拔去大慙如剔朽蠹朝端
動色至求識其面以為異人以功超授奉議大夫太史
院判官繼升同僉院事賜金帶一貂鼠袍一公在史院
曹局有以景星見請上聞公持不可曰使天下共見則
為不欺越九日太白經天奏衆始服其有見上嘗從容
詢公南土所居公對以西湖葛嶺之勝為洒宸翰書山
居字未幾給告以樹勅賜贈考樞密公墓碑即日歸歸
山掃迹城府者十年人不堪其淡泊而自裕如至正乙

未中書奏公舊勞起公行宣政院判官時江東浙西盜
羣嘯乃改建德路總管建德古嚴州州在萬山中屬邑
淳安又連歛境賊由歛闖我界而還者疑長樂鄉民為
盜謀者執以歸諸獄連數百家民益洵主師者謀往捕
公不可曰虛謀者知倘因疑枉鼓衆亂賊得乘釁突來
悔焉及我請撫之果不測當任其咎遂肩輿從數隸直
抵淳安邑人嘗厄官軍抄掠已皇皇散匿山谷間公載
米二百石聲言賑濟使縣令馳以諭明日帥調兵來公

禁止之使待命乃動擅動者如軍法長樂去邑二百里
令至布公意民皆歡呼持牛酒來拜公公喜曰吾固知
民不吾負即日偕帥者還公蒞郡視之如家民亦視公
如父母自江淮驛廢嚴為通道窘於供頓公信今晝之
用給而人不擾將戍過軍之跋扈者皆服公信令田里
不聞叫呼隳突於是像而祠碑而頌者凡十有四所前
良二千石未有也時公年已七十有三累請老丞相達識
公數使勞之公卒謝事去是年行省承制已浙東師起

公辭去居淞江之鶴砂行省最公功上中書升浙東道都元帥進階中奉大夫公不起則以半俸優老焉所著有山居新詒山居要覽行於世公生於至正乙酉四月某日歿於至正辛丑七月十八日公長物琴劍書外無銖金斗粟貧無以為葬閱八月六日兩浙漕使夏公敷友義力賙其喪獲返柩杭之葛嶺先塋之次公娶某氏次娶高麗氏子男六人長埴次垌垌培墀垓垓先公卒女三人長適鄉貢進士應才次適瞿彥俊次適懷遠大

將軍同僉江浙等處行樞密院事俞忠孫男六人孫女
四人某於公為同姓昆弟詳其出處行實諸孤哀衰詣
邸次泣拜請銘義不容辭銘曰

人疑弗決我以籌人懼弗前我以趨叶彼爭前競決我
止我糾去權奸如贅由由兮物泊乎其不留於乎今之
人古之求我銘其人孰與儔

墓碑

故處士殷君墓碑

殷子姓以國氏逮宋避宣祖諱別族太史為戴氏者君之先也及君而宋亡遂復姓殷氏諱澄字公原華亭人宋朝請君某之孫節幹君某之子司法君某之弟也君家素饒財節幹君用好施著於其鄉每大雪淫雨必載薪米遍乞寒餒人死無所歸者為具衾櫬窆之衆目之曰殷佛子娶鄉邑迺氏女得丈夫子二君其季也君狀貌魁梧美鬚髯性介特平生無宿諾人有急不一計親疎周之惟恐後衆有所爭來直於君得一言明曲直即

謝去不復詣吏有田若干晦終歲所入盡以贖人事苟涉大義雖委身不問至元間天兵下江南將軍號楊掃地者帥偏師入華亭君時避地南錢南錢猶保聚未肯下楊怒業以兵殲之君奮曰我其無一言而死乎我死今日否亦今日遂扣軍門求見大言曰夫民猶水也水順則流逆則激民順則寧逆則亂矧郡縣新附民心未安將軍獨不能撫綏招徠以稱上神武不殺之德顧欲盡勦斯民何辜楊怒甚手劔斥君君復正色曰殺我

一人活千萬人我死猶生也語益激烈動人其裨將有
感君語者起而沮之而楊亦懼服於時民全活者以萬
計咸涕泣羅拜曰公於我生死而肉骨也願歲時伏臘
祀公於社以報事聞丞相巴延公義之遂用便宜授君
華亭軍民都總管使守其地君即棄去曰大宋氏亡吾
以親不亡獨不能逸乎遂服野服隱居胥浦上時時領
客放浪九峰三泖間愜愜懷古日夕忘返慕其人者目
為泖南浪翁君聞知曰甚善名我因亦自謂泖南浪翁

云嗚呼代之強仁慕義者不少也而多逸於野太史氏
又缺焉不書是為善者終無以勸也君沒幾五十年而
未有表白其事者猶幸其概在人耳目者卓卓未泯余
因著諸所聞為論次之使後有過其墓者得以知君之
為人若此庶幾為強仁慕義者之勸哉君娶會稽俞氏
女賢而無子先君一年卒又娶永嘉陳氏女生子四人
曰實曰厚曰誠曰謹側室生一人曰某孫男五尚質尚
節尚白尚功尚賢生女五壻曰吳郡顧謨吳興沈斯干

宋諸王孫宜樞同邑倪乘吳郡章禮曾孫男八陞奎壁
堂塾塾堅堅女七玄孫男二君生於宋紹定己丑六月
二日享年七十有七卒於國朝大德乙巳九月某日葬
於華亭縣胥浦鄉五保謝家原合祔俞夫人之封後十
四年而葬陳夫人於其城又三十二年諱乃樹石墓門
而會稽楊公為叙而銘之其辭曰

仁之言利既博叶仁之行聞卓卓矢一死質萬殤棄爵
秩不以償北強以兵叶南義剛若斯人者殆南方之強

非歟嗚呼斯人吾言不亡

改危素桂先生碑

信之龍虎山為漢天師張氏之學者恒千餘人其卓犖瑰竒之士亦間見其間若桂先生者是已先生諱義方字心淵世為信貴溪人母生先生時夢李淳風寄宿因名李寄長從上清宮熊尊師學元貞元年從天師張公朝京授蘄州道官歸而散其衣資飄然有遠志周覽名山由武至匡廬夜宿太平興國宮龍出屋後無犯先生

居蜿蜒辟易而後去數飛躡層嵯與豹同行好事者莫能蹤跡之樵人有見之山南同日又有見之山北者山中人酒熟曰顧安得桂先生飲之俄先生至欣然就飲所飲者家以為吉徵尊官顯人過江上者咸願見先生先生見不見人莫測也江州守某乞詩惟書一閑字與之踰月以事去官先生率意成詩書座右銘類多做世絕俗語有金蓬頭者居聖井山先生致書封題甚謹登之白紙耳金大嘆曰至此果無說說矣道士吳李誠作

渾淪菴迎先生居之先生嘆曰明年吾當歸矣明年至
正元年正月朔條然而逝越三日山南北道士奉遺蛻
葬諸聖治峰麓道士方從義為予言先生之族有公武
者號抱甕先生得仙術卒葬分嶺中夜家間有聲詰旦
視之但空棺耳有仲勛者號閑閑子通內外典與丞相
陳福公為布衣交先生之兄與信號點點子學道終南
山緘口不言升座而化三日容色不變豈其山川之所
鍾然也耶予昔游潯陽見先生聽其言無過高難行之

論吁有道之士哉銘曰

柱史度關騎青牛五千遺言增隱憂更秦逮漢習益瘡
燕齊方士相呀噉道人隱居恒內脩漆園尚友天同游
一朝委蛻去莫留太史作銘表其丘

墓誌銘

故忠勇西夏侯穆爾古蘇公墓銘

君諱穆爾古蘇字善卿西夏人也曾祖烏呼訥祖伊實
滿俱不仕父布格蘇宦於杭生君自幼有竒氣善擊搏

技既而自悔曰伎勇有敵聖賢之學無敵也遂從師通
詩易二經以詩登進士第官紹興錄事長槍氏市馬紹
興挾苗兵為佐白取餘食市間不問苗真偽咸拘囚之
傳其爰上省李官時苗長虐令如火莫孰何又有省府
千夫長與郡攝帥者根株為奸利抱苗長文告鉗結東
徒大姓家且縱苗白日什伍鈔民君下約民曰人怖狼
狼亦怖人狼弗殺食人爾錄長無玉帛狗馬身及赤口
四耳誓以家徇殺根株鈔民者民皆俯地雷應曰惟錄

長君命夜交乙君躬率民兵殺苗不遺一噍盜起婺牧
溪洞君以大夫命領所部抵洞賊問官軍姓曰邁某也
皆倒戈伏罪君收撫之不血一刃府命據蕭邑私聚民
糧贖民貸徭民土田聞君到邑怖而匿去又明年西寇
犯浦江君率兵至諸稽寇望風遁嶺臺命守諸暨臺借
糧於民下令會府民無受令者君班師郡城諭以文告
民輸糧者縑屬不絕攻無堅敵宇民如子令無不行被
旨經歷江東憲府事瀕行民哭泣擁馬首不得行時海

寇勢橫甚虎踞娥江君奮不顧身為士卒先追迫其人於數百里外大鄉在南端覆右海勢佯浮宴君陰畜健兒戶下袖金博囉擊死之屍瘞戒珠僧院民皆麻衣跣慟從以萬計贈官中大夫僉江浙樞密院事謚忠勇封西夏侯君嘗語曰吾死使君子題其冢曰義烈墓文必賴直筆者傳傳無出會稽抱遺先生也若識之今不幸陷死地先生嘗以其人入鐵史編收吾名足矣予為之泣然隕涕曰天將滅乎狂醜也使長城君也生天未滅

乎狂醜也長城君溘先其死死又非地也天之生才其有以乎無以乎吾無從而叩也悲哉銘曰

吁嗟乎善卿生也者吾不知胡為而生死也者吾不知

胡為而死生不世音集年仕不四年而名長萬紀嗚呼獬

豸折角兮麒麟躡趾豕突西嶽兮鯨翻東海已乎善卿爾果胡為而生又果胡為而死

故翰林侍講學士金華先生墓誌銘

先生諱縉字晉卿姓黃氏其先自宋太史庭堅之後父

昉繇雙井家浦江後遷義烏遂占籍焉曰伯信者先生之高祖也曰夢炎淳祐進士仕朝散大夫行太常丞兼樞密編脩官者曾祖也曰愕以進納恩補承節郎今以推恩贈嘉議大夫禮部尚書上輕車都尉追封江夏郡侯者大父也曰鑄今贈中奉大夫江淞等處行中書省參知政事追封江夏郡公者父也中奉公元出朝散公外孫女王氏歸丁應復之後嘉議公疾廢育之為子也妣童氏追封江夏郡夫人夫人姓先生時繡湖水清歷

世有四日夜夢大星煜煜然墜於懷公始生至元十四年之冬十一月日也比成童不妄踰戶闥授以書矢口即成誦年十三屬文作弔諸葛武侯文為鄉先生劉公應龜所竒因留受業大德五年舉教官舉憲史已而復棄之多忤上官去延祐元年貢舉法行縣大夫以先生充賦古賦以太極命題古賦以極命題場屋士不能為獨先生以楚聲為之遂冠場明年奉大對授徵仕郎寧海縣丞江浙省臣承制遷石堰場監運事秩滿陞從仕

郎諸暨州判官至順初用薦入為翰林應奉進階儒林
郎丁外憂去秩服闋轉承直郎國子博士閱六年請補
外換奉政大夫江剡儒學提舉時先生年始六十有七
不俟引年以侍親疾絕江徑歸俄有旨預修遼金宋三
史丁內憂不赴服除以中順大夫秘書少監致仕久之
又被上旨落職致仕仍舊階除翰林直學士至京中書
傳旨擢兼經筵官召見慈仁殿游陞中奉大夫侍講學
士同知經筵事明年歸田里不俟報而行上聞遣使者

追復前職又明年始獲南還閱七年而薨享年八十有一葬縣東北三里東塾之原娶王氏將仕郎桂之女封江夏郡夫人先一年卒男梓用應入官忠顯校尉同知餘姚州事女清適惠州學正陳克讓先生位至法從蕭然不異布衣時又寡嗜欲年四十即獨榻於外給侍左右者兩黃頭而已遇佳山水竟日忘去形於篇什多冲淡簡遠之情然性剛中觸物或弦急不可犯少時即泮然無復停礙與同鄉柳太常貫為文友風節文章在柳

上人呼黃柳其論著依據義例考援的切在禁林三史
惜以憂輟其脩后妃功臣傳士類服其精當經筵處講
文皆切於治道之大者晚年喜為浮圖亦研極其閎濶
之說請者盈門馱亦麾之去其為文表箋書叙傳記贊
說誌銘凡若干篇曰損齋藁若干卷義烏志若干卷賦
若干首於乎我朝文章雄唱推魯姚公再變推蜀虞公
三變而為金華兩先生也五峯李孝光嘗與予為兩先
生評余曰柳太常如東魯社翁課閻子弟言言有遺

事黃太史如獨繭遺絲初不諧衆響至趣柱絙弦激絕之音出於天成者亦非衆音可諧也孝光以吾言為然太史攷文江浙時余辱與連房卷有不可遺落者必決於予在杭提學時謁文者填至必取予筆代應且又不掩於人曰吾文有豪縱不為格律囚者此非吾文乃楊庶夫文也自京南歸時予見於天竺山謂予曰吾老且休矣吾子文絕辨已白於禁林宋三百年綱目屬之子矣嗚呼今亡矣吾終不得為公史臣徒矣悲夫因其鄉生

浙西道廉訪司僉事鄭公深出其徒宋濂狀求余銘遂
忍而銘且悼喪亂未得謚於朝與其徒私謚曰文貞先
生銘之詞曰

大之星煜煜兮繡之水穆穆兮文之毓兮大星翳兮繡
水墮兮文之逝兮惟文之鳴兮大音在廷爾鏞爾箎兮
我瑟我笙鼓之淵兮磬之鏗兮氣一并兮有元氏之聲
兮吁嗟今默默兮孰見古人之泯泯洋響以上駝兮膏
吾車其曷從

有元文靜先生倪公墓碑銘代歐陽先生作

玄聞房山高公充恭在南端時薦天下士五人曰教公
繼翁鄧公文原陳公康祖倪公淵姚公式天下謂之五
儁鄧公官至法從教與姚卒官文學倪公晚始以縣大
夫引年然皆以文行相高論五儁者不以位之崇卑優
劣焉玄慕五儁如慕古人而倪公之孫璪奉公之門生
鄭汝原所狀行來謁銘其墓玄忝論選之職銘公何慊
抑何幸哉公諱淵字仲深其先後儀人出漢御史寬裔

五世祖南金以武弁仕宋從其君南遷因家錢唐四世
祖某又從家烏程故今為湖州人曾祖俊民弗仕祖椿
年路分兵馬監押父守貞自號愛山處士以公貴贈承
務郎松江府判官母濮氏贈恭人公生而卓異精敏絕
人讀書過目輒成誦嘗則前人之勤以自課命其書舍
曰經鋤長遂通五經尤精於易三禮初用薦者言為本
郡學錄及高公以五僞並薦於朝未報而行省調公杭
州儒學正江淞巴勒噶岱平遣子從公受學且移文中

書舉公可教國子而中書已擬臺章所薦五雋各補郡
文學乃升公為杭教授在杭學復田之曾沒於勢家者
若干畝新學舍造祭器撤上丁俗樂訪得宋太常樂工
兩人俾以雅樂教諸生胄監聞之因招致兩樂工為國
子樂師今諸郡學皆作登歌樂者實自公倡之中書左
丞高公昉又舉公編脩官以親老辭乃授本郡教授以
便養未上丁外艱服除在湖學做安定舊規列經義治
事齋以惠來學者人為立生祠公移文止之不得躬往

撤之用累攷入流得當塗縣主簿時長官皆以故免去
獨公理縣事縣版籍不明公手為分劃編次瞭若指掌
二稅始如期而集歲旱民告災縣長斥去所上狀公曰
錢穀國計民生國本理末而撥其本可乎語不合投劾
去闔府駭然遣吏遮留之一以檢覈委公民賴以蘇縣
前汙沮格久之公攜得舊田立復田為塘和州民有田
在縣境猾民與交易券成而負其直訟則執券折之官
莫能下至是越江來訴公探得猾者情始懼卒以直歸

之民立異姓為後者所後父母歿且十年有同姓而非族者依倚前官牟其產至給帖者左驗民直於公公白按摘其誣者數事盡反所奪部使者元公永貞至郡庶公德政曰吾按太平池州得良吏僅當塗主簿而已遂薦公可上縣令而公已無復仕進意告老而歸受加恩承務郎杭州路富陽縣尹致仕既老於家杜門罕與人士接益潛心於易著易集說二十八卷圖說叙列各一卷病革之夕猶置易几案諷誦之語其子曰死期至矣

夫復何言須臾脩逝至正二年夏六月二十九日也年七十有八娶鄭氏先十八年卒贈恭人子男三人長驥已卒次駿松江府儒學教授次駢女二長適楊福孫亦已卒次適陸元瑾孫男六長璨用公廕為紹興路錢清務副使次璠琰璋瑛瓚女三曾孫男二女二公昆弟四人伯叔季俱早世叔有遺孤甫四歲撫而教之踰于己子伯季皆無嗣則以駿駢為之後駿等遵治命以其年冬十月某日奉柩烏程縣德政鄉毗山先墓之次學者

私謚曰文靚先生韓子曰位不稱德者有後公盛年以俊稱於時而官僅佐下邑非位不稱德者歟知其後之必大無疑也銘曰

先生之氏自漢御史經鋤有堂探易諏禮吁嗟先生早有令聞五雋同稱爭翔競奮宜位館閣歌唐頌虞大道甚夷先生徐徐白首窮經覺我後覺晚佐一縣亦展所學鄭公註禮註律益精焦氏治易治盜有聲位不滿德時人所惜君子處之惟謙故益不在身在其子孫史

氏有撰貽厥後昆

七兄雙溪書院山長墓誌銘

君姓楊氏諱維翰字子固自號方塘越之暨易人曾大父文脩號佛子子朱子為常平使道楓川聞其名請見與談論竟日及遇異人移所患瘤安易韓先生某為述私傳大父宓父寧皆有隱德鄉里推長者母同里劉氏君生至元甲午正月二十日父嘗目之曰是子生有神氣長必大吾宗時伯父實以倉使歸老於家禮聘名儒

若東泉陳先生某桐西馮先生某為之師從父山陰縣
封宏叔父賀皆喜讀史君與維楨攻學無寒暑抵夜以
漏分為度睡則以水沃面君於經子能以疑難詰其師
會其解而後已辯史至繁節連柱兩叔父長作文嗜三
蘇字帖喜雙井黃氏每讀上韓太尉書擊節慷慨曰不
讀此無以發人浩然之氣朝廷貢舉法行維楨中進士
第君以文過高屢為有司枉遂筮仕郡文學初帥府檄
為慈溪邑校在職不事瑣屑惟推經術贊縣長為治后

遷天台邑校先是維楨尹茲邑稱弟子者安普氏許廣
氏君至尤以作人為任時安許氏皆擢第歸事君猶師
焉遣子弟及邑俊彥傳經者百餘人邑士語曰小楊君
政不忘大楊君教重光考滿陞饒之雙溪山長郡守韓
公鏞素聞其人一見即器重稱其文議論高古有氣燄
可畏尤愛其詩有大歷體無幾保薦於江東分憲業用
而以病卒官舍時至正辛卯正月十三日也君素肆直
無表暴衣不事兼副被服恒如寒儒未嘗少降詞色希

悅於人所居州里有公議句論裁可否不合申辯不休
不為權力屈時人稱曰古之遺直者晚年游戲墨蘭竹
石極精妙興至即揮洒侍筆札者給弗之暇人求者無
貴賤悉為作時監辯博士柯九思自以為弗及推曰方
塘竹云尤好覽天文及天下名山川形勝有所得則述
為歌詩人爭誦之號光嶽集攷經有稗穢錄書畫有藝
游畧君男一善孫男二樹河女孫一君嘗戒善曰女父
玷校官女叔拔上第女母鄉先生虞雷氏之孫也女弗

學振吾家聲吾弗子幸今善苦學有志操吾期其有成
克應先訓君年五十有八死一千里外善能不遠水陸
力護柩歸舍以是年十二月甲辰克葬於長寧鄉馮山
祖塋之次從先志也越明年某月日善至吾錢唐官次
泣且請曰先君不幸制竒數年不周六甲官卑無治狀
其器業文藝又不得善文言者為之章顯地下重不幸
善重不孝代之善立言者善未聞幸叔父勿讓銘吾先
君維禎為悽然感涕叙其概而銘之曰

干將不斷堅不以稱不利騏驥不馳遠不以稱不力於
乎伯也言為世格行為世則不大祿食以放厥職於乎
伯也窮居大行蔑損與益吾與伯也講之白矣吾又何
計位卑與崇壽遲與迫耶

故義士呂公墓誌銘

公諱良佐字輔之姓呂氏世居淞之呂港大父德謙父
允恭字萊翁皆隱德不仕公早穎悟讀書輒強記了大
義長儀宇魁梧器識才幹尤係人望咸以公輔器期之

以其出太公望望嘗釣得璜又識其港曰璜溪號公曰
璜溪處士性至孝奉母謝氏養以禮不旦暮衰母疾身
不脫帶者三月久不瘳禱以自代母卒哀毀終喪制闋
邦大夫挽之仕弗起然政有不決者必咨之郡飢有司
申明發粟公笑曰必俟明降而賑民孳矣宜先假粟富
民俟降以償則富者無費粟饑者獲全生郡善之貢舉法
行聘碩師教子復出厚幣為賞試曰應奎文會貧時好
學者建義塾收而教之金華黃太史縉嘗記其事兵興

來總兵淞者聞公才傑至枉駕公廬與語大說即板授公華亭令公請以白衣議事却板授總兵益賢之署曰義士俾自集白甲保障其境時公已散財收死士三千餘人適斥鹵羣不逞乘亂起烏合搖毒甚公徒釋棚走不勤官徒一鏃第指授白甲用水火舸取其魁如利獺取鯨羣從盡戢竟賴以安者數千家總兵北向竒功公曰醫恃鍼砭理疾而小巫用精籍亦理覆進其魁桀於兵曰天下之物莫毒於鷄毒而醫家珍而用之總兵是

其言轉無俾為精兵不尠淮兵難渡主師者辟公幕下
力拒不就繼取其子恂判海鹽時浙垣首相以承制除
拜遂教授令佐鄉郡又力辭私謂其子曰時平庸才高
枕而有餘時危豪傑運籌而不足非蕭鄩侯曷治漕韓
淮陰曷調兵而魯連子曷出沒亂世而裕如也吾願學
連子而已耳又喟然曰日月剝矣昭然有不不紊者江河
壅矣浩然有不竭者孺子其俟之公好義出天性里有
飢周之婚喪助之四方大夫士歸之者歲無虛燕來贖

往靡厭勸得美譽湖海間呼為淞上田文獨不賢異端之學緇黃者接其人而不談其實術其高情曠識獨立物外者人又莫能窺懼世難虞謙亨自若與知己飲酒率過丙夜振起自舞考鼓吹笛復飲不亂平生少疾臨終無一語及後事但曰吾年六十有五不夭已幸又不死叵測復何憾生至元乙未歿至正己亥娶高氏征東萬戶宣武公孫女也子二長恒次恂女三孫五克閭復亨恒子也宗齊宗嶽宗望恂子也冬十月辛酉葬瀆之

北原先遠日恒衣衰抵予杭次舍泣而舍杖拜曰先子
不樂仕無治狀而義行在鄉善言在家在邦者又不得
名能文屬比於志不孝在後嗣奚贖先生恒師而先子
大賓也幸哀而賜之銘吾為位哭技淚以銘念古衛公
叔文子之謚君子韙其貞惠今淞人飢而夫子有賑粟
不貞乎具二善而不祿命宜謚曰貞惠云銘曰

踣車無仲尼覆舟無伯夷義以勇卒全以歸曰貞曰惠
匪謚予私於乎噫嘻莫尊乎野而位者覆卑璜之許粟之

垂有過其墓而慕其人者語吾銘詩

巴延元卿墓銘

元卿名巴延呼圖克國族也泰定四年阿都齊榜賜進士
出身授某官二十年官至江浙省宣政院判其為人有
氣節在官以廉直稱遇事善持論裁人倚為平擢第後
盡舍所為文博極經史諸子百家古詩離騷選樂府歌
行出語務追古人至正壬辰紅巾寇起江南元卿官歲
滿以本省檄起總制浙之三關理戎職巖巖有風采斬

賊有藏草間者必游徼得之必劓殄伴無育於邑安集
邑遺民民倚之為藩衛歸之如父母閱三年忽以謗去
官過杭見余無幾病風竟不能出語卒卒於台某所踰
月其子武童與其門吏始訃余草葬台某山徵墓銘余
與元卿同年也不得辭銘曰
十夫揉椎屢至投機一語所畏無翼而飛卒至於犇而
病病而喑喑而死也吾於元卿乎何悲

歐陽彥珍墓銘

君諱公瑾字彥珍其世出廬陵宋文忠公脩今翰林承旨玄功從弟也祖某封某官父某不仕君自幼警穎長通經術旁及書數兵刑之法試藝於有司不售憲府才其人舉為司書不數年掾行中書考滿都事浙東帥府在掾時執政者多任己喜怒不以民害利為事君抱卷執議未嘗少阿法當而人利者必累請必行後已不當雖受怒罵必格音閤事有它掾不遑行止者必行止於君其在帥幕建議以伏海寇當以長伎久算不宜試小計

規小利以為功又某官恃文事往喻寇君力言不可喻
幸小順乃大恭不順即不順喻者必死為大國辱已而
果然嘗建平海策若干言主帥者不能用請辭職歸養
太夫人不可鬱成疾未幾以太夫人憂去職執喪如禮
法制闋遊淞中得疾友家歸卒於杭君娶閩王氏宣文
檢討餘慶女弟也子三人長太平次某女四人皆妻名
士臨終謂其子曰吾結貴交多市道惟會稽楊某為古
道且為古文名東南汝往請銘平服纓來以遺命泣而

請銘曰

在家溫溫在官墳墳墳有法溫溫有文故家為孝子
官為幹臣幹曰必了不了嫁婚幸終其親其又何冤

趙公衛道墓誌銘

公趙氏諱祭字衛道號素軒居越之姚江宋燕懿王德
昭之十二世孫曾祖希秦宋朝議大夫知衢州軍州事
贈大理寺丞祖與宜宋朝散郎溧水縣尉父孟侶宋朝
散郎慶元路沿海制叅贈太府寺簿母恭人董氏先係

五世祖太師諱師龍長孫孟尊之第三子也寺簿無子
螟之公博學於書無不讀讀必有論裁學成無所於試
大德己亥江淞儒司舉為昌化教諭轉桐廬教諭由年
勞陞饒之長蘄書院長復長溫之宗晦書院元統甲戌
受牒命教授溫州越五年教授常州在處學校有濫給
廩給者必首汰之以其膳膳儒之老病殘疾及貧無依
者早年散家貲結交先達凡工文與琴書律歷醫藥陰
陽者家皆館食西廡不以歲月計士友告急度家即盡

如所請與之致空囊不問酒灌量能倍斗酣次為古歌
詩聯章沓韻對客可待嘗與友飲大醉梅花樹下曰梅
花獨不能飲乎急呼酒用大白海澆其根且為問梅詞
又為代答詞平生所為詩無慮數百什名素軒集若干
卷公生於某年卒於至正四年六月五日享年七十有
一明年葬於姚江雙雁鄉之原孤子礬持其叔叙狀詣
門泣道遺命求予銘予以早歲託公忘年交義不得辭
遂銘曰

王之孫降皂闈君為孫而文詩英酒聖交有神大樹勸
汝海白樽歸大樹羅之村

南容教授杜公碣銘

祭統云銘者論著其先德之善功烈慶賞聲名於天下

予友裴貢士曰章嘗將其友杜子直來謁曰此南容教
授曾孫其仲三而續文脉南容者直也閱三年直以南
容公行狀謁予松江次舍曰吾祖任不大無功狀爵名
可書然德善在鄉有足示後者直大父父不獲登先生
門直獲登焉而先生賜銘曾大父大父晦先德者庶

直足以贖之予閱狀證之以鄉父兄之言則知南容長者也人至以三杜姓其村其教澤淑於人者淺而義行範於人者遠也初季父某無後螟莫姓子齒幼復以公為後季父歿侯螟齒長以家產歸之而復冠娶待之不異同氣皇慶間其族困於里徭公倡率義役歲儲粟若干給之隣里姻友不能嫁娶喪葬周之各有差渴道有漿斷津有梁凡歲於急義即勇為者類此予因喟然曰吾周遊東南大族甲姓優為此者不足多公以中產為

之難也。淞有饒貲家，利酷權，兼兄弟戕死，里氓者不顧。吁！鄉父兄之談南容長者之不去口，有以哉！此宜得銘也。公諱英發，字俊卿，早年遊京師，以才名得學正建寧。年勞升南容教授，未幾即棄官歸，隱於淞之西霞，自號西霞道人。歲延碩師教子弟，裴貢士嘗容其所娶某氏。男一孫，一曾孫，三友直友諒友聞生於宋，己巳卒於今。至正庚寅享年八十有二，葬青龍之原，祔祖塋，預思菴之右銘曰：

彼戕同氣我友螟以義彼併連阡我給征以田吾知南
容義且仁出於性覃於人澤及後昆至今鄉之人襲杜
固姓其村

白雲漫士陶君墓碣銘

天台陶孝子宗儀死其親已三年制闋猶哀哀來拜予
雲間次舍泣而曰今日奮起風雲附王公大臣者其聲
光赫矣然有身沒名著者必託之名能文家否則與腐
草同盡先子官卑志則大粗見於歷官者無名能文書

之儀坐不孝先生名能文言又足信萬古敢以墓辭不
獲按遂昌鄭元祐狀君姓陶氏諱煜字明遠自號逍與
山人又更號白雲漫士從鄉先生周公榮學學成遊京
邑王公貴人竒其狀貌言議傾下之已而翩然來歸曰
燕趙多竒士今所見仍爾家貧親且老遂屈身就祿試
吏蘭溪州陞補江陰州州民有劉鐵者欲犯屠人妻屠
訟鐵鐵抵罪怒縛其妻卒犯之屠捉刀刺鐵君議奸殺
非故比屠免之君平反部使者審讞一如君所言又豪

民朱管坐戮死籍沒兩家田歸丞相府相以無賴少年為爪牙縱暴陷民財民被榜掠死者無算有訴於府者府從風指莫孰何君進白府曰朝廷命公尹是邦忍坐視赤子殞命於餓虎之吭耶無賴者覆詭文移省為遣使至府府賞以幣以年勞除杭州東北錄典史有畏吾人與其妻生女已十歲一朝為省行人即別娶抑賤正妻且瑾一室囚之婢引女訴主母枉錄長不敢受詞君曰此婢去三人俱死矣遂受詞伸理行人坐黜退果遷

湖州歸安時湖州已陷賊君從主兵者劃計策遄復湖州之糧君為檄文走一介召諸艘具至無時刻違錄功中書不報調紹興上虞縣嘆曰吾懷抱利器不後於今之人而浮沈六察不得與今之攬權力者比年已莫死期將至矣尚何言哉遂卒於郡都昌坊之寓舍享年七十有三戊戌九月二十七日也配趙氏故宗室諱孟本女也子三人長宗儀宗傳宗儒女三人銘曰

其貌魁如其論魁如考功千吏秩乎不可誣用不能大

卒老死簿書噫嘻乎自古才而仕仕而漫者豈惟是夫
兩浙轉運司書史何君墓誌銘

君姓何氏諱宗實字誠甫其先曾大父直方繇東平徙
杭大父德遂占籍為杭人父祥娶周氏皆樂善好施君
微時遇善相者曰此子神清骨秀他日樹何氏門戶者
必此子也既長善讀律能權衡世事料後成敗如著見
性鯁直弗尚外矯為義不讓人遇不義退處如怯夫尋
試吏下邑以能聲著陞杭州府史明年秋郡當慮囚檄

君典獄案君窮爰書底訊鞠論報發其留白李官悉決
遺枉者昭雪不以嫌避囚有法當劓時犯者皆跽死君
曰劓雖著令民迫不得已耳上方施仁政恤肉刑鼻可
以死地棄哉君以墨限劓當法而已咸謂如其仁如其
仁後竟為故事格當調調者咸購大郡有賢守將足矣
郡奚擇於大小卒調毘陵居無何進曰郡守行仁政必
自鰥寡孤獨始矧舊制立養濟院惠民局以濟窮察病
今院概非窮民處局又弗核實鰥寡孤獨何利哉郡守

下其議郡轄一州邑賦役號難治田畝多為勢匿郡守
選君土其地均之君詢高年究畝瘠肥及核戶豐約繇
賦役均穀祿平為鄰郡最尋富民妄訴田有災君詰之
詞窮要以賄君曰吏當守法農當守耕爾以豐為歎詒
縣官我以法覈實奚敢以賄敗我法卒黜之郡守賢其
人呼必以字戶部尚書秦公為兩都運使道過毘陵詢
能吏於郡守以君對秦公亦素聞其能因訪以鹽筴君
疏上利病大奇之會丁母憂事輟服除起復為掾是年


儉運判李公分漕嘉興君立條告先輸者賞後者罰民
誑誤禁者出怙者必刑時天積雨盆不成鹽君齋沐露
禱明日雨止鹽賦告足咸以為何君至誠能感神明年
典戶曹君樹格殊常式四方商旅來者如市賦用倍盈
事聞上錫酒旌官吏勞官曰何掾服勤宜先我酌君以
為吏筮楚民之賦羨而受上賞後必有甚焉者遂解去
郡邑大夫高之日造其廬與評事君辭不可遂隱居王
泉山自號一懶翁君素仁孝慈愛所得俸奉母外以覃

於族母疾晝不出夜衣不解帶母於朔望夜嘗露香禱
天曰富貴非吾願願吾孫事吾子亦若子事我也杭城
灾四止成墟君室廬獨歸然存人皆以為孝感所致兄
宗茂同居無間言怡如也妹一人適戴氏戴歿君給養
其家子女為嫁娶隣婦有哭甚哀者君微之喪其良人
貧無以治棺即賻之他日婦至請傭以償直君曰周汝
急豈望報乎婦謝而去君當屬纊神裁不變召其子敏
及兄子敬於前命之曰凡子之事親生事以禮死葬以

禮爾慎毋為異端惑語終奄然而逝君娶沈氏勤儉有
家法生子一人敏是也又賈氏生女在穉敏力學不勸
有司辟為浦城縣學教諭未上而君卒君生於前至元
甲午夏五月十日卒於至正十三年正月十有九日享
年六十歲是年三月壬申葬於錢唐北山玉泉松義里
之原敏樹石丙舍哭位來乞銘銘曰

展矣何君如其仁刑有劓與死淪君平施之復生存風
灾屋廬無間鄰君一室奉親人莫與京而獨得于天

嗚呼何君如其仁年不踰甲祿不享夫身尚嗣爾後人



東維子集卷二十四

欽定四庫全書

集部

東維子集卷二十五
六

詳校官中書臣孫衡

中書臣劉源溥覆勘

總校官進士臣繆琪

校對官編修臣莊通敏

謄錄監生臣王茂源

欽定四庫全書

東維子集卷二十五

元 楊維禎 撰

墓誌銘

馮進卿墓誌銘

富春馮堅氏衷衰來拜予姑胥舍次日堅不孝先子以
某年某月日猝亡堅忍死將以某月某日葬先生以異
姓弟先子亡無先生銘與草木沒沒也堅不孝益甚子

為之位哭堅歸而畀之志與銘使刻諸碣云君名士升
字進卿其先陳留人自其曾大父志學徙家杭之富春
山遂為富春人大父從周宋承事郎華亭縣鹽場提幹
伯父驥宋武康主簿宋亡死節於獨松關父革不仕及
長跣跣不羈而有志通律令圖籍及九丘之書以時
舉子業為俗學棄弗習然負器畧喜功名慕傅介子班
定遠之為人嘗欲走京師吐其磊砢者於執政貴臣以
為世之爵祿可俯而拾也至正初漳徼賊作朝廷聚湖

江浙之兵相持不即殄滅君欲獻策招誘不煩一矢之遺可拘繫弗行晚乃與羣弟拓祖廬起大門宅擔同居不分宅成而君卒矣享年五十有一嗚呼君之器可謂奇矣志可謂大矣而訖無所就以卒嗚呼天既生人之才以為用然又天閼不使直遂者不可得而知也君生於大德丁酉至正丁亥五月四日卒以明年某月葬某地第四人士願士晉士豫士仁娶裴氏生男堅女貞孫男二人允邵允文壻為同里諸國用嗚呼以君才之踞

志之縮而卒也則其有後者可知已銘曰

已乎進卿有才以為庸有志以為衷天既信其始而又
絀其終彼蒙者從我明獨則凶已乎進卿貴也者吾不
知其所以通賤也者吾不知其所以窮

虞隱君墓誌銘

吳郡海虞山之陰其溪曰東蘆有隱君焉為虞仲元氏
生於前至元甲午十月十有三日歿于至正戊子三月
二日是年十月某日葬于虞山西麓小澗之原先葬之

一月其孤德懋來拜余吳門曰先君生無仕績祿於世死不得文可傳者銘草亡木卒耳不孝孤惟是懼且今奎章學士虞公集游吳謂君曰吾渡江派有在海虞而海虞之隱德賴有君焉於是與公通譜牒吾子公之上第門生幸有以銘諸按狀君名安廬字仲元其系實出虞仲氏自唐文懿公世南陪葬昭陵始為雍人後十有一世某從僖宗入蜀又為蜀人八傳而為宋太師雍國公兄文扈駕渡南子姓有尋周讓王之隱跡於海虞者

故隱君為吳人曾大父某任宋將仕郎父某弗仕母郭氏君生而性靜深長有器局謹事其親如禮其親沒事其長如父家政必承其出又必相其審於義決於力也故舉無過差時節祀先必哭泣若初喪時歲延碩師課子姪以道義學將招其私塾籍私田其中以為先氏虞仲學官事未集而歿兄弟同居者五十年鄉黨以孝友聞媼戚朋舊服其交久而敬後至元間行丞相府聞其人才且賢嘗檄授福寧州路都監稅官君不苟進曰使

某有仕宦情吾官不在筦庫家矣遂謝病傳事家督不入官府不事鄉里請謁自號野齋然郡有名公卿往往以客禮見之垂終呼德懋無他語惟曰吾幸生承平時竊師友之教安富尊榮優游以卒世得為一世全人吾復何憾爾曹勉旃不為吾不為為吾所能為而已娶同里望族周氏恭儉慈惠克相於內子二人長德懋也娶同里沙溪故宋楊察推女孫次德賢居幼女一人贅同郡于尚書孫德潤孫男一人寶住夫德有所助雖賤必

書春秋法也樹石立銘固不得顛諸六服官政者若君
引迹自晦上德有光於虞仲得稱隱君焉是得銘已銘
曰

翳海虞氏繇隱南奔迨雍國公南派又分式忠式孝在
爾子孫相爾子孫既才實蕃才而弗用用野自文觀其
事親出可事君夫豈筦庫而可耻身為世全人闇然而
晦年若弗永永德於聞大海翕翕小澗泫泫我文著隱
勿崩其墳

吳君見心墓銘

至正八年十月二十六日余友富春吳君卒家貧無以
葬閱明年十一月某日賴同里友馮士頤葬某地其孤
毅來求銘余悲不忍銘往哭其墓毅申前請嗚呼又何
忍不銘君諱復字見心生有異稟四歲能誦書千餘言
弱冠失怙刻苦讀書不以貧難少置生無偽言行與人
約雖千里外不失期刻性喜吟哦善效白長慶歌謠禱
詩有諷切貪奸其人諱者欲以危法中之不為屈予讀

書大桐山時君長通書願與弟子列及余寓居錢唐太湖間遂舍妻子從予遊學古文歌詩始君持所作詩來自夸穢同列詩屏棄如棄涕唾余覽詩笑曰子欲輩季唐伎亦至高欲追古必焚滅舊語君變色不敢言徐取楮筆錄余琴操及春俠辭二十餘首去越一月復來謝曰先生詩法得矣吾舊詩亦焚矣第出語猶吾前日詩也奈何余曰姑歇汝哦事靜讀古風雅騷及古樂府幾耳又退而閱三月來出所作曰余舊語忘新語出矣賴

先生教幸而或馴致於古遂編次余古詩凡十卷加以評註能道余所欲言余詩有逸者君輒能補之觀者謂可亂余真自後下筆必出人意表嘗雪夜與余遊東西洞庭徒步登七十二弁之峰其語益厓拔皆竒氣所鍾世人莫之識也去年約余遊廬山觀瀑布馴至岳陽訪鐵笛亭未行而以病告病三月而逝矣臨終告其友陳倫曰天乎死我矣使加我數年吾詩不後二季吾文不遜吾師嗚呼君死矣吾愛遊太山長谷孰余相耶吾唱

古歌詩孰余和耶吾性急卒未能寡過君執直敢議又孰余議耶吾見君之學也如朱頓積不訾江河之傾不可休其立志如匙勘鑰矢破的為文如大將旗鼓建而三軍所指無不如意蓋其來日登而未止迺今止於斯耶前年夢遊天漢探天孫支機石穴為研池遂自稱雲槎秋客而所攜研且號機石云嗚呼君也生而食不給祿不及也蓋不以外者為憾矣其不五十而卒也又豈以為憾哉大父某父某皆貧學而不仕娶李氏子毅穆女

一人適同里余驥世傳其雲槎集凡十卷茅山張外史
雨為之序云銘曰

嗟吳子雕龍貴麟賊天真天所嗔子之道宜鬱屯嗟吾
子忽已淪文不死千萬春

孝友先生秦公墓誌銘

孝友先生既沒五年其嗣子約因其友袁華謁予雲間
而致其辭曰約不幸先人學而貧貧而又不得高年死
又不得名能文者銘重不孝先人事業不用亡得稱行

義著述有不得不白者已賴楊東溪氏狀其詳敢丐吾子屬比之余始來吳聞昆太倉為貨居地不為習屈挺然以文行自立者二人焉曰東溪老人楊公諱洎先生也予皆不及識矣而獲見東溪所為先生狀蓋若識於目睫間故不辭論次其事而銘之先生諱玉字德卿姓秦氏其先鹽城人世以儒學顯宋紹興間由某祖徙居崇明之東沙與袁陸謝為望族而秦氏尤以衣冠文物稱重其鄉曾祖棟祖楛皆宋太學上舍生父庚從蛟峯

方先生學咸淳末以詩試通州第一人國朝不仕清萬
戶王溪劉公聞其隱德延致於館因又徙昆之太倉家
焉君四歲即挺然不羣能屬句對五歲能暗誦孝經論
語八歲而喪父哀慕如成人母顧氏日夜躬織紵資先
生亦感奮曰吾家世有聞人其可自我斬乎益刻苦自
力比長通五經尤邃於詩會貢舉法行州長踵其後舉
先生先生告予學豈為決科計哉遂辭性至孝友事母與
兄無違禮事大小悉稟以行母有疾藥食必親嘗累旬

日不解帶母卒哀泣至血執喪過禮終喪不沐浴不鹽
醎人以為難初居喪隣有火熾不可捄家人收貲為出
走計獨先生伏櫬慟不去火且及屋壁遽自滅州長上其
孝行將得旌寵輒謝止之憲史張公揆行部閱其行義
見其所著文論薦之且約偕詣闕弗行居常晦默如愚
人見貴人益自閉匿然衣冠服器必整飭與弟子講解
音吐洒然而媿媿無倦教授鄉里二十年嘗曰士讀書
將以惠天下不幸不及仕而教人為文行經術亦惠耳

里之貧不能學者為給饘粥筆札教之嘗行道間得遺金訪其主還之封識如故有盜入室竊布帛去明日復來僕覘執之使縱之去舊有土田在東沙族人據有之遂不問并以舊書歸之後其人感化皆歸於善類先生之於孝友於蹈義執禮至此亦可謂之篤行君子者已先生前歿之歲嘗夢為詩猶記其末句曰五湖四海一閑人及覺悟曰合五與四一為十五十月疾驗矣四而虛其一為三明年三月吾疾殆不起矣乎至期果符其

言屬續神色不變時至正四年二月二十四日也得年五十有三其徒私謚曰孝友先生君娶顧氏子男二長約次壁壁先卒約能世其學女二先生讀書之舍自名曰迂濶所著有詩經纂例大學中庸探說宋三朝摘要齋居雜錄并詩文若干卷藏於家葬某所銘曰

人之機也我曰愚我之達也人曰迂嗟先生愚不如迂自居四一以虛卒允符誠使徇愚以好用徇迂以利趨道弗信而畫於途孰愈孝與友之謚於徒

元故樂閒先生墓誌銘

公諱錫珪字君玉其先出唐學士遂良遂良由河南遷
錢唐子孫所居號褚家塘其後有徙居茗城者亦以褚
姓其巷今聚族南潯之西朱塢庄者即自茗城來有起
身科第者為宋迪功郎淮安縣丞士登公會大父也宋
將仕郎管元吉公大父也宋將仕郎國史實錄院檢閱
文字天祐公考也公性沈靜寡言自幼有識量檢閱君
嘗夜遇盜盜認君巾服欲刺之公潛以他衣冠易之於

傭皂而免長究心經史游庠序間獵獵有俊聲安定書院舉之儒臺授耒陽縣令公曰吾親老且病忍一日去側耶雖不仕得朝夕養吾親吾志周滿借有高位違孝而往不為也矧縣令未必能信所志者乎遂辭朝夕躬上食親前親有疾衣不解帶者累月藥餌必親嘗乃進居喪哀而毀有常情所不堪既葬追慕若將見之至老弗渝篤孝之行人無間言里父老訓其子弟之事親必指公為則云族有貧不自給者則貸之粟不償者焚其

券又多蓄善藥以濟人平居雖燕處必冠對客則風流
談論務使之盡驩晚歲鑿池築圃蒔花竹以自娛創樂
閒堂因自號樂閒居士其在鄉閭平率人物比漢陳實
博古而尤善知今事人比唐齊幹行游城中邦大夫候
其車音爭相迎致問時政莫不尊而稱之為樂閒先生
公生於宋德祐五月二十二日卒於今至元庚辰六月
二十九日年六十有六娶張氏四男長嗣良次嗣英出
繼叔後次嗣俊嗣賢女一適董汝華孫男六應椿應桂

應松應杓應權應樞以至正三年正月六日葬於烏程永新鄉大金峰塢之原傳曰施媼女衣褐天下稱妍貴諸赤手天下稱勇士之美者又豈藉區區爵位耶吾觀樂閒先生者是已先生卻仕而閒為孝子為義士其卒也不應銘法歟銘曰

孝為則兮義不頗任則少兮德則多先生之樂兮陰陽爭和先生之則兮爭紀於瀆與河南之得可竭金之岡兮可陂我銘其人兮不可磨

元故用軒先生墓誌銘

番有隱君子為用軒韓先生先生歿十年所其嗣元璧
既克葬尚銜哀弗置走余錢唐次舍拜有請曰先子生
有輔世志訖不得祿位以死片言騎行有幾古人死又
不得文而可傳者銘是與草亡木卒等不孝孤罪益甚
吾子屢銘德人義士賢公卿先子世次言行具在歲志
吾子哀而賜之銘非真不孝孤貫罪先世世遠有耀已
余嘗觀杭圖志見有宋韓左廂者以進士起身由臨安

令以嚴明陞臨安府左廂官臨安剽民財者白擎子聞公至皆屏跡謠曰韓廂明無白擎韓廂死白擎起未嘗不起慕其人問元璧曰即先生五世祖也按家乘韓為番著姓其先南陽人唐末徙徽之黃瓊復遷饒之樂平歷宋擢科者代不乏絕靖康間諱屏者中武舉尋自恥悔再游太學登文第官至臨安左廂者即治白擎者也諱仲龍丞相趙忠定公之壻以詩學五中待補者先生之祖也諱如璋遭宋革隱居讀書於里之北山號菜山

先生者先生之考也先生諱思恭字德用學者尊之曰
用軒先生先生幼不習羣弄早悟書數學長負器備好
善惡惡甚至鄉里有不平事掀髯一言折於稠衆中哀
者屈鬱者吐氣或為非義惟恐先生聞之若畏王彥方
者邑大夫史公夢龍豪傑士也事先生如師先生嘗語
之曰土敝者草不蕃水煩者魚不育守令者民之土水
也又曰廉而不諒直而不決糊塗皂白以從事其敝甚
跖史公書其言於座右訟有不決者馳狀質先生憑一

言舉置為曲直饒有貢國初以天姓督陶先生嘗領其事有獻策者某室之基在陶某田之畔在汰即依策毀室廬壞溝渠計百十家立待先生不從曰損民利國非國之福也可誣民乎既而室者田者或來謝復拒之水旱疾疫必露香額天為衆告急告必有應歲饑率有力者食餓至藥病掩骼自奉薄甚碩師教子弟歲金節幣竊竊惟恐後事親至孝妣李孺人沒水漿不入口者三日因致重疾菜山公年垂八袞晚多病侍藥膳不少懈

病革不交睫至搗掌代痛居喪一遵朱氏禮喪祭之禮
獨任不以綴伯仲氏配曰程夫人同里程剛愍公孫女
也克相無違先生資以修於家先生卒子男三璧璫璿
女二壻為王恭簡公孫與善王知錄孫惟澤先生生於
宋咸淳丙寅六月二十有八日沒於今至順壬申七月
八日享年六十又七先是里之石龍岡有龜蛇交集勢
秀峰離列下走兩阜為陂陀若雙蚌然兩源挾蚌出號
號循龜虵而東去龜之有二石筍相距尋丈間銜青烏

者以為古人宅兆也先生喜之嘗挾策止此語元璧曰
吾百歲後必藏此於是明年八月某日葬於龍岡之嘴
用治命也吾聞士有隱德者必享其榮以及其子孫先
生德人也享榮不於身使不祿位以沒荷其及者不在
後之人乎元璧清明好學有仕才吾見左廂氏之重榮
可必也銘曰

龍之支兮為蛇為龜

鳩叶

龜之筍兮相掬相繆下走雙峰

兮兩源挾流小鍾草石兮大鍾俊髦有德之人兮闕於

丘

故張君子墓銘

吳人張天祥既克葬先孝君被服斬經謁子門拜有請
曰吾子以文章銘世之賢公卿善人先孝君雖賤雅亡
惡吳之人無識不識咸稱曰君子人先世多繇進士起
幸子立一言信若惇史非直不肖孤幸先世世遠有耀
已世次言行謹備壻馬良狀余至蘇讀蘓郡乘知張吳
顧陸為四顯姓而張氏蔓衍為獨盛今又聞其後有君

子人者張氏之澤曷其遠也哉按良狀君諱必成字舜
卿曾大父巡大父浩父愷俱隱德不仕其先自晉廣州
刺史彭祖後子姓至宋齊彌昌遂為吳大家逮前朝登
皇祐進士第者僑僑後顏顏後敏功敏功後攀四世皆
第進士君攀八世孫也生至正乙酉八月十七日卒至
正戊子正月八日年六十有四配陳氏子男三嫡天祥
天德庶天祐女三人長適馬良仲適程可大季適曹繼
宗仲嫡出也孫男女八人卒之年三月十日葬長洲縣

武丘鄉靈壽崗之原君生不好弄長簡厚甚年十四喪父哀毀如禮養母以孝聞事其伯氏若父既冠娶自立盡讓田廬諸兄旁建宅一區容亭師舍靡不完好外養市徒理生產日富畜藏必推其羨以及人弗懈兒婦入諫止則曰積弗散不有天蓄必有人禍緩急扣門者應如不及佛老家營大土木亦樂予之貲惟不樂遣子孫習吏術尋仕階以為棄今誤人之仕寧棄道路吾非不欲仕也仕而弗利人人覆我病不若不仕兩忘失云平

居氣貌和霽於物無忤雖家人妾僕未嘗識其疾聲怒色有以橫逆加之必自反久之其人意自消晚年病痿痺弗接人事誠諸子曰予少自奪鑒延方伎士卻病而病速施財非鬼覬福報報邈如惟寡欲乃大藥擇師傅教子孫乃樹福本若輩識之故三子有仕才類弗干祿天祥且繼志築書樓購未見典籍藏之厚禮碩師以淑子姪及里中兒君聞其所為喜曰天祥為吾所未及為非其孝乎吾雖卧為廢人無憾又戒諸子擔弗以婦言

分異書田氏荆木事視曰無知如木尚識所托况人乎
若輩思之罔墜吾訓吾門其大矣其言鑿乎應君子之
教且過未嘗弗知知未嘗復為君子之仁也吾聞古者有
諸侯大夫之位雖無德稱君子稱其位也有諸侯大夫
之德雖無位稱君子稱其德也一介之賤稱君子法不
當得銘乎銘曰

位振人德振身振人者名歸之而尊弗親振身者天下
歸仁日以尊親無羣君子哉若人視予銘詩詩可信

蔣生元冢銘

生名元字亨之吳興安化鄉陳瀆里人也祖慶元主簿
必直父宣政院掾克明元生質機警五歲入小學日誦
書數千言十歲善屬文二十學明經義試有司不競輒
自忿曰吾學經無師說吾黜宜也乃歸告其父曰會稽
楊先生某東南授經之師吾將不遠千里執贄而北面
之父憂其素病羸止之曰天其蔣門之幸先生從吾聘
汝學可已不須奔走千里學未可望而我憂先焉汝學

之成不成卜於先生之來不來也予嘉其父子心往焉
時至正四年十一月某日也閱三年元學成蔣氏之族
咸相慶曰元以先生之來不來卜學之成不某等又以
元之成不卜蔣氏之盛衰焉元成矣先生之賜不微矣
蔣氏之慶長矣嗚呼又豈料元學成而娶娶而即死乎
始余至元家元婦家催元娶速予語其父曰元娶學無
成理遲吾業可授父力卻婦家娶期期三年而通媾元
得卒學婦家申娶期適相者又言曰元娶早早亡娶遲

十年可免爾元父弗信娶焉娶未月而元病未期而元死矣於戲相者之言其得天歟得人歟元學吾春秋者也春秋之法以人合天不以天任天元之卒受教予其以人合天歟其娶而即死抑以天任天者歟嗚呼人歟天歟吾不得而知之矣元生於泰定元年四月二十七日死至正七年八月初六日也閱二十日無赴又閱二十日夜夢元衣其所常服來拜曰元死矣幸遵先生教不娶而學僅有成不幸而符相者言急娶而速死也

吾父兄將以某月某日葬元車注之原元學於先生無毫毛表世死無先生一言以表吾埋土吾其迄與黃土同腐乎予聞其言怛而警亟諾之明旦有扣門者乃蔣氏佖赴也予為之哭慟遂俾學子吳毅書其志復銘曰生以人得天死不得天以人吁嗟元乎睿而病而厘未宦而昏力天厥身人耶吾不知其所因

華亭縣主簿王佳母夫人李氏墓誌銘

華亭縣主簿王佳母夫人李氏諱淑貞處州教授某之

女教授君博極羣書而傳業在其女嘗曰吾女必嫁奇
士年既笄適同郡遂昌邑西平王氏迪功君之子延洪
洪負卓越才以青年遊京師華衣奴馬從名貴遊得
徽官於湖西鬱林州未幾沒官所時夫人年方艾鞠養
三子長學次佳次海擇以傅就學學回必親試其所誦
書探其課對工拙為賞罰故三子克有成立夫人之教
也至正戊戌鄉民乘亂為椎埋剽奪夫人挈帑屬避地
松陽之眷家所長子學死於兵故廬燬於火夫人憂悸

成疾辛丑冬十二月卒於眷家所明年春藁葬遂冒月
山之麓龍鳳乙巳江表吳主延攬英俊凡鉅室子弟有
奇才者不次登用丙午秋佳在選中丁未春授官華亭
縣主簿明年冬始獲歸葬於先塋西亭之原先遠日佳
以其友葉微所著行狀來乞銘予客華亭親見佳健於
趣辦浚蘇河領夫丁若干萬無失所慢役者漕糧四十
餘萬至京城無後期繼漕麥五十餘萬淞麥以澇失穫
折銀估大家藉其稱貸鉅豪濟所急佐邑長聽獄訟先

燭其欺後翦其蔓民自以為無冤滯得佐邑循吏稱豈
非母夫人之教澤耶故樂為之銘曰

婦艾夫子幼失父婦訖完其節子訖以才舉焚黃薦

哀亦榮爾母我銘不已爰示來後

叶戶

王母李氏墓誌銘

江陰王孝子作逢去其母逝已十餘年猶作嬰兒泣謁
於會稽楊維禎曰逢藉有立母教也傳見野史沈蒙氏
未得名能文如韓愈氏者誌親逝不得韓公銘不孝今

以屬先生先生幸哀而賜之銘辭不獲按狀夫人姓李氏諱靖真宋獄官同郡潤之女杭庫使王惠之妻生子一即逢也庫使君善律已起身憲漕累遷至永豐縣幕致事杭庫副使初姑徐氏器庫使君之為人求可與齊者姻里皆賢李舊族教子女不違古訓求偶莫李氏若妯告宜笄五年歸于王婦道甚飭庫使君在吳時李侍姑就養姑清閱一紀若一日舉族皆以為難其訓子嚴有法日給膏燭誦書約丙夜止或逾約輒誦至旦罰餘

食出就外傳乏贄師物躬紡績以資之且多市古竒書
廣其聞見逢齒壯所還徃皆海內一時名俊陰自憚曰
兒不負我矣天厯飢民相引鼠偷率女奴組績更寢盜
不敢闕巷以為之歌曰東家辟纪西家穿窬其內治類
此至正五年秋八月三日疾卒於夫官下壽五十九逢
護櫬旋葬黃山原逢齒今四十以才諳顯東州諸侯爭
欲致門下浙憲使舉丘園俱不就風節益烈焉君子稱
王母有子矣是可銘銘曰

子以母教者臧母以子留者皆長益後歐陽歐陽謝白

嘻句以王

先生自註曰以字旌也
不可作助語詞

故鄒元銘妻金氏墓碣銘

吳常熟鄒元銘之妻金氏諱玉字孟姬寧國路旌德縣
稅務大使辟之冢婦衛輝路管民長官司總管謙之長
女廣德路道錄善信之孫漳州路龍興縣尹煥之曾孫
也姬從幼慧齊性孝謹日在父母傍不忍頃刻離去撫
婢御未嘗見迂氣其織紵組紃及音律書算皆不習而

工有過人者諷詩書即通大義讀列女傳見有孝於親
事舅姑盡苦節者必識之信踐之及歸鄒氏執婦職如
禮甚育子若女自襁褓有法相其夫急人以義睦嫻任
恤無不適宜焉舅姑皆稱賢無間言然慕父母未嘗一
日替嫁凡十歲三歸寧及辭去戚戚如初嫁時今年遂
以歸寧終父母家訃聞夫族齊望門哭曰某婦死無以
成吾鄒氏家矣得年僅二十有七生於至治辛酉十二
月初五日卒於至正丁亥三月二十有五日女一人升

奴男一人壽童元銘卜是年四月初一日祔於武丘鄉
半塘祖塋之原閱十日來請銘余住吳久之聞沙湖金
氏為有禮法之家徃徃所適女多賢行都人士之詩曰
彼君子女謂之尹吉尹吉者周大族有禮法之家也女
有君子行必推自尹吉孟姬出大家而閑於禮法如此
謂尹吉女非歟尹吉女為詩人所著而予為銘詩著孟
姬閱其令質不永年使名氏有傳豈過乎銘曰

梓共而秀而夭抱株驥墮地走而躓中途彼惡終天齡

跛運長衢吾壹不知其所如嗟嗟乎孟女宜鄒大家孰
長短於短之不足而長有餘誦我銘詩不人誣

東維子集卷二十五

欽定四庫全書

東維子集卷二十六

元 楊維禎 撰

墓誌銘

高節先生墓銘

先生諱侶字君友姓嚴氏子陵三十五世孫也嚴本莊
姓以漢明帝諱易之子陵以高名著史冊耕富春山釣
桐水年八十終娶梅氏西京壽春尉福女生茂茂生隆

隆生卓由是而降踰唐歷宋衍為四家甲家傳格為先生曾大父潤玉大父自中考也俱不仕先生生而有奇氣讀書不為覓舉計從學鄉先生漢英賈公賈公得於復齊趙公趙公得於潛室陳公陳公親授於晦菴朱子此其淵源也貴官至釣臺必訪先生勸之仕則曰漢雲臺諸將仕非不赫赫今子姓無聞吾鼻祖去之一千三百有餘年而高風遠韻與富山桐水相為峙流士奚必以仕而貴哉某不敏願為嚴子陵賢子孫足矣居家教

授生徒有裹糧自甌越來者宋相文山氏客謝翱奇士也雪夜與之登西臺絕頂祭酒慟哭以鐵如意擊石復作楚客歌聲振林木人莫能測其意也暮年建汐社為會取晚而有信翱卒無子與社中友買地臺南葬之築許劔亭憲使盧公摯高其義為之書嘗遊錢唐偕石塘胡公山村仇公過孤山酌林處士岳鄂王墓卒有動於中告二人曰某常時如此親必不安亟歸及門遽有終天之別擗踊氣絕者數四治喪祭一用朱子禮廬墓三

年不稅衰經不見賓客有白燕巢墳木事母益虔母卒
哀毀成疾幾不起每至生旦服墨縗哀慟踰它時所居
堂名以高遠取郡守王祕已釣臺書院語至順辛未冬
十月晦疾革呼其子淵曰吾年已踰六十不稱天奉祖
祠四十年復土田教養無忝吾死何憾平疇西地吾已
買諸官死必葬是遂逝越若干年為至正丁亥始克葬
賢者故事有易名門人黃廷玉等私謚曰高節復請諸
郡守祠於祖祠西小室娶黃氏宋榜眼進士黃蛻曾孫

女子一淵也越十年丁酉余以建德理官過釣臺淵從
余謁祖祠遂登雙臺訪子陵釣跡因酌高節君墓又訪
臺南謝竒士塚余為竒士立阡表明年淵持廷玉所為
狀來請曰謝竒士表於吾子若有待先子之行應銘法
其待如竒士幸吾子銘之遂銘曰

於古風颯乎胡可追千有百禩不畫厥岐不背厥馳矐
乎不知其後時我銘其人維高有堪維高有堪維遠有
遺

馮處謙墓銘

至正丙申秋余以建德理官道富陽抵友馮頤家頤伯仲氏曰升與豫皆相次去世豫之子宣衷衰前拜曰宣不孝先子以蚤年歿外邸歿且六年未克葬今年冬某月日將祔吉峴祖墓次幸先生哀而賜之銘庶先子不悼不百齡不孝孤不無蓋覆余與頤為昆仲交三十年嘗銘其伯考父寺丞公考仁山公伯氏升今又銘豫尚忍換筆耶君名豫字處謙宋承信郎僉嘉興府廳事從

周孫集賢殿脩撰驥從子承信君生三子長蒙歿次革
次觀革以孝義式鄉里外中書以義士旌其門義士生
三子曰升曰頤曰晉觀生二子一即君次仁君於伯仲
居四早喪父義士公撫之如己子君友悌長氏不翅同
母出一門數百指怡怡恂恂內外無間言義士公殖生
日以饒君以里之困乏者勸分援劉子曰惠君子君子
得其福惠小人小人得其力利出者祿及怨往者禍入
公是其言又嘗謂人能羣者以分能分者以禮義士公

逝歲時月旦相其長氏必請合族綴食之禮惟恐不及
君為人高亢剛直讀書務通大義與人友尚氣節痛遠
烏集之交狀貌魁梧美鬚髯達官要人皆折勢位交之
曰君固我朝人也薦之仕則辭曰吾剛不能售以磷吾
直不能售以回薦者謝而止娶李氏宋南劍知府桂孫
女一子宣也君懇懇戒曰瘠地民材勞也沃地民不材
饒也汝毋恃驕棄學使吾有沃地懼也宣力學訖為名
士君生於大德己酉八月八日以暑疾卒於杭至正九

年五月十三日也得年四十有二銘曰
不厲而剛剛不墜不矯而直直不跲小夫匍匐等禽犢
欲然我信無不足天路中止匪不祿寄言特義聞者服
矧曰有子子式穀長穀遐行續前躅

姚處士墓誌銘

君諱椿壽字大年其先出唐開元宰相崇曾孫秘監合
嘗守睦因家焉至六世孫為祕簿宗之宗之子三人一
居峨溪曰二府君是為君八世祖曾大父思晟登宋景

定壬戌榜進士第階承節郎大父潼翔宋鄉貢進士父
元慶隱居不仕妣王氏司諫某女君幼機敏不習羣兒
弄長丰姿偉特讀書輒了大義闢樂育館歲聘海內名
師儒教子弟及里中兒君性端直平生無二言與人交
始終見底裏於義利曲直必嚴其辨鄉鄰有爭者不直
有司直於君得一言即解去歲饑周人之急惟恐弗及
稱貸者久則焚券與之創世濟橋峨溪上橋置亭歲五
六月施茗飲饘粥於行者行者不勸橋西古松篁萬立

築亭名深淨又構層臺曰松麓賢士夫往來必延致其中觴詠笑談至忘朝夕邦大夫馬公薛超吾道經桐廬聞君枉道過門以處士禮禮之邑侯周善達都等皆嘗問政於君君必以利害中民竅者鑿鑿言之民便其言者甚衆晚勉其弟同壽曰兄老病無宦情弟齒壯學裕必廝名仕版圖光其先同壽因自奮北覲得餘干校官君娶袁氏吉水教授某女也子三曰雋先卒次粲次采孫男四曰德元德懋德祥德瑞君生於大德庚子五月

十三日沒於至正癸巳十月十九日得年五十有四越
三年十一月六日窆於桐君山北孝仁之原又一年其
子粲謁余理官次再拜泣曰先子介不樂仕無功德可
書然孝友行於家任恤行於里者不得文章家一言以
示不朽非先子不幸粲不孝也粲辱為先生從幸先生
賜之銘按其客鄉貢進士魏鈞狀為之誌而銘曰

桐之岡蚪蚪桐之瀨秋秋孝原一培山水相繆是為峨
溪姚處士之丘

故處士馮君墓誌銘

君諱天瑞字通甫世居和州之馬江縣曾大父某本郡
幕府長曾祖妣黃氏大父某隱德不仕祖妣慶氏君自
幼機警讀書不事章句務大義善屬文見人善必稱道
不已見惡則嫉之如仇議藝不售借逕於郡史復自厭
其筐篋之習竟辭歸卒業於儒築草堂青山之麓日以
書史課子招延賓客為觴詠之樂兵興藩間以屢徵不
應遊徼入境不敢犯處士門鄉里稱為季世之全人乙

未夏六月以疾終於寢榮年五十有九娶張氏先一年
卒生子一人居仁由帥府經歷調分水丞遷京城兵馬
女一人適同里汪晉再娶華氏生子二人長居義後更
名榮由京都鎮撫調神武清軍衛知事遷華亭知縣次
居禮未仕女一人適同郡鄧英公生於大元元貞丁酉
九月四日沒於大明龍鳳乙未六月二日時淮甸兵梗
未得返故丘權厝周家圩之原戊申冬合張氏兆歸葬
於邑東東山祖塋之次是年秋居仁偕榮衰駢拜予雲

問郎次乞一言銘墓石且為孝子祿養不得於事生而得先生大事於送終孝子孤之心亦揚矣是敢乞銘於先生辭不獲為之銘曰

金以不祥躍兮璧以有用墜叶吁嗟先生兮是為全人
喬山處士翟君墓誌銘

君諱德興字宗起姓翟氏喬山野人其自號也世居無為州濡須之巢縣曾大父某自巢遷和州之含山父福遂占籍焉兵變君挈家避地滁州閱三月而沒藁葬全

椒縣之明山娶同邑司氏君沒四年後卒於太平州藁
葬采石之麓子二人長桂次清女一人滿兒適同郡孫
倌桂以才名簡知今天子於南京授千夫長部落于同
僉趙公征進宣徽安慶九江等處以功升鎮撫清京城
廣武衛百夫長君生於大元大德甲辰歿於至正壬辰
四月初五日享年四十有九洪武二年桂遷柩於明山
復還妣柩采石合葬於巢之翟家嶠西關之原先遠日
桂來拜予草玄閣次曰不孝孤生齒未丁壯不幸失所

恃又三年失所怙零丁孤苦藉祖考澤得以謏名仕版
祿食於朝而三釜之養不能一勺及親此不孝孤終天
之憾也倘死又不得當代大手筆紀其卒葬地所不孝
之罪號天何以自贖是敢介先生從子明具狀以乞銘
吾重違其情畀之銘曰

父溘先兮無以家叶母去棄兮又以途於乎孝子之天
天曷呼淮之西兮江之東歸合兆兮兆既同於乎孝子
之天天終從

又銘曰

玉韞兮火烈木定兮風危親弗獲兮莫予追匪今茲兮
我罹吁嗟翟氏之子兮我又何悲

淵默先生碣銘

至正十四年三月二十日壬午淵默先生余君卒既葬其
友及門人問易名於會稽楊維禎維禎曰先生深靜而
寡言嘗自號淵默宜從曰淵默皆應曰宜其子安禮又
持先生門人殷奎狀來請銘先生諱曰強字產莊姓余

氏其先閩之古田人十二世祖揭仕宋官至吏部尚書
受知徽宗既徽宗手書余尚書祠額賜其子孫曾大父
諱佑大父諱鄭父諱與可武夷書院山長自號藍溪始
居岷山為崑山人先娶趙氏無子再娶陳氏生先生初
藍溪為李後姓李氏至先生始復姓余云先生年十四
喪父能自樹立極力於學脩習容止步趨圈豚如老成
人既長學通六經百氏博貫精析退然不知有餘且善
屬文根柢六經不淆異說其書有尚書補註若干卷藏

於家嘗為舉子業已而厭其剽取傳註支延蔓衍其言
不足傳遠遂絕意弗為居一晦之宮叱咤之聲不聞於
外足跡未嘗一至庸貴富人門鄉人盡聞先生然終身
有不識先生為短長瘠肥者世壽五十有二配潘氏生
子二人長曰安禮次安禧女二人長適王居敬次適許
淵葬州南一里先塋之左葬之日朋友遠近畢至余曩
來岷山與友者纔四三人耳今余亦老矣去年一人卒
先生又卒嗚呼余尚忍銘先生耶銘曰

駭之譎而飯駿之苑麟之變而秦兕之園瑯鳴衝璜擇地而踐吁嗟淵默孰云其蹇

尚綱先生墓銘

先生諱德嘉字立禮姓衛氏其先渤海人七世祖文中宋朝散大夫兼侍講始居錢唐六世祖上達大中大夫禮部尚書又自錢唐徙華亭建炎初大中公從叔中大夫禮部侍郎膚敏扈蹕南渡亦居華亭五世祖穉脩職郎國子博士高祖端操朝奉大夫衛尉少卿曾祖僑

大中大夫軍器監丞祖宗武通奉大夫資政殿大學士
考謙入國初以世官後授温州路治中弗就妣黃氏繼
張氏男三先生其長也在豎不好狎弄就外傅日誦經
籍數千言下逮諸子百氏靡不研究性孝厚慤誠晚年
以風節自持失儷二十有八年不二娶平居篤於人倫
恬於勢利弱冠時左丞郝公嘗辟為掾使君辭曰吾弗
能為奴隸也宣慰羅公舉以茂材授潮州路儒學正君
又辭曰觸瘴毒以貽親憂吾弗敢也自是不出戶庭者

三十年布衣菲食以終其身每戒其子曰汝不躬耒以
耕佃人者及汝藉之食者宜予之以恩汝從父縛佃以
督逋予解而去之逋亦終不負汝識之至正壬辰盜起
剽州里解散者十室而九先生獨守祖考室曰吾舍此
將何之寇至吾有抱室死先祠下耳其孝誠之篤如此
甲子春疾作其子謁醫却之小差忽曰四月九日之夕
吾當逝矣且曰汝父平生無以過人僅不忝所生耳父
書具在汝讀之為君子毋有失德玷吾世胄又毋徇世

俗作浮圖事壞吾家法言畢而逝生至元二十四年丁亥十月十七日卒至正十四年甲午四月九日享年六十有八娶任氏中憲大夫浙東道宣慰副使任公仁發女子男二長仁近次復孫男二皆幼以是月二十九日葬余山之原距逝之六年仁近猶衰衰來拜吾松次舍乞銘余曩來松以友兄先生先生逝予繫官不及走喪次業將醊其墓與一二友私謚先生先生嘗自號尚綱翁宜以尚綱易名又不辭而為銘表之墓石曰

曾子與若華元娶不更管又安世年不出死不兵仲統
樂志遺世榮陶子給力恩必矜嗟嗟兼德集以成清規
若訓貽厥仍我謚以綱夫何疑

雪溪處士邵公墓誌銘

予嘗客雲間雲間陸先生嘗稱胥水之南多世家邵呂
陳陸其尤也先生自其先館邵氏幾七世歷凡一百五
十年又云邵氏家老侍僮亦自高曾曾玄皆世其職業
祿養為一家之世臣予求世家於近代三葉而不替者

勘矣矧六葉七葉乎客有持先生狀雪溪公者抵予次舍為雪溪之壻倪琦也以墓文為請即胥水邵也予欣鹽其世澤為之叙而銘公諱彌遠字子猷自號雪溪有譜為康節公十世孫也高祖宗穆流避兵火渡江至華亭遂家焉曾大父德隆父思聰皆儒業教子以經術父天驥以易經中宋待補國朝崇學選士就試入郡庠升賽序弗居公待補君冢子也通父經博涉羣子史為文取辭達不喜雕繪身服朴素亦不喜騎乘絕志仕宦有

勸之仕者則曰仕不在吾在吾子若孫耳嘗戒其孫之
仕曰古之博學深謀而不遇時者衆矣今之遇者大抵
尸未腐而名已滅若輩其戒哉暮年假佛老學洗慮輕
財急施至飯沙門賑飢民無算民依而聚廬者無慮百
十家所居四面大渠悉達石梁治園地第宅之東風日
佳時必移觴豆以燕悅其親守義塾於先軌年雖飢師
生廩餼不輒廢也壯年喪偶懲閔子之寒弗繼室付妾
御之慈愛者保育諸幼預營生域建精舍守以浮屠而

尊吾聖人像設其中嘗慕漢東平王蒼以為善最樂又
喜唐張公藝忍字為家法迺輯經傳言善與忍者為百
善百忍圖州里多傳之為勸性不嗜酒客至必與飲飲
輒醉醉輒放歌客亦無不樂者喪明者十年家事傳于
冢子南時燕月會必至花竹間其衣冠濟濟然傳儀亦
潦潦然如常時至正己亥夏病癰閱月餘悉召子若孫
曰吾逝矣永訣不少亂或謂公直知寂滅為樂者儒而
悟理者獨不然乎生宋德祐甲戌殆今至正己亥七月

享年八十有六娶馮氏先卒男一南也庶三應奎應參
應元女三孫五煥炳燾經綸女孫八曾孫五垠堦埏垓
炳子也麟煥子也是年九月六日葬某丘生域銘曰燾
言有文行有馴蒼藝之教倣後昆歷年百五十而家有
世臣引壽及耄終弗亂神君子謂善之澤吉之人

故處士倪君墓誌銘

吳興倪處士名驥字子舉沒且葬已九年其嗣子璨猶
涕泣於其父之執楊維禎曰璨不幸早孤居喪無已聞

先子沒若干年又不遑以名顯而墓道之石又不及求
文章家者銘重燦不孝惟先子隱德不任其事業亡稱
於世而人之知者益鮮非吾子以其及知書之何以伸
先志且慰藉後人耶維禎為文靜先生門生也先生處
士之父某父事先生遂與處士為弟兄處士銘何辭吳
興之倪氏始顯於兵馬監押某公至文靜始大處士自
幼喜讀書有遠志長與先生自為師友研極名理非世
儒所能解嘗走京師以其所學干貴人不合即遂絕仕

宦志人勸之仕則曰吾賴先廕免耒耜勞苦得稱處士
若中足矣去家之北三里所為毗山有園池花竹之勝
先生且治冢舍其中處士時侍先生遊息於此登山臨
水或坐盤石竟日無一言忽有所得則寫之於琴琴不
足又寫之於畫琴最善水雲遠意無俗師趣數節族畫
亦有求工於人識者謂與今高吏部爭拙法於海岳菴
至正元年處士之生四十九矣忽謂家人曰買臣五十
當富貴吾明年五十當逝矣於是預為棺斂葬埋之具

明年果得疾告其父曰驤平生一言一行毋欺暗室無負於大人矣惟溘先於大人不克報罔極為終天恨天實為之奈之何哉疾亟之日夕尚疏喪儀戒其子爾勿用異教俗樂問夜何其二鼓矣曰盍秉燭我坐令家人勿哭遂瞑至正壬午九月六日也父文靜先生淵母鄭氏男四長璠次肅次璋皆習舉子業女三長適闕元祿次許適楊詠未行次在幼孫男一承孫是年十一月十七日葬於烏程縣昆山瑩之北銘曰

四十九已知非又知死生可知處士不仕非不時五十
馬用富貴為長苔之曲山之昆處士之墓藏於斯視後
不朽吾銘詩

元故陳處士墓誌銘

吳興吳淑巽公嘗以座主禮事余過余錢唐次舍談其
徒之好學者陳君善曰吳人師余數學於文獨君為義
理學又曰陳氏代以貨權其鄉君始典學鑿鑿乎期輩
古之人端木生不學孔子終貨殖耳此余稱其好學也

敢以見先生後余二十年過吳興而君與吳公俱已隔
世無幾趙伯陽氏將君之子嗣亨來謁銘因為之感而
銘諸君名良能字善之其先自陳武皇生湖之長興白
石里子孫至今蕃衍為君望姓郡城之南曰六老堂故
地君之考德新號恒齋者始徙居焉曾祖世昌祖日裕
皆奕世有德行君自幼機警恒齋公意有屬輒能先事
承之公喜而撫之曰大吾門者必是子也長習國子學
干祿于執政者不合即退閉門讀書務求聖賢旨趣皆

思吳公以躬行之要其言曰在正心心正則上合天理
近當人情盡此之謂忠推此之謂恕時時誦習其語以
自儆莫年治生貲業益裕復拓居之北偏初宅一區蒔
花竹設器玩奉恒齋公以老壽九袞乃終君居喪水漿
不入口者三日喪紀一遵朱氏家禮歲時祀享極於精
誠親所嗜好必具薦之緇黃淫祀皆屏去不惑伯兄早
世奉伯嫂以禮事仲兄情好怡如撫孤姪恩摯如子交
友以信遇宗族以仁厚與同閨諸老月為鄉飲以相樂

扁所居堂曰庸齋士友至者必款留觴詠久益不勸君
為人識高量弘兼善論裁不苟同不詭激鄉之人受其
言視其行以為則惟恐過差聞於君即有聞必陳誠勸
止故其卒也咸思其人而哭之生於至元二十六年己
丑閏十月二十日歿於至正十年庚寅八月十八日得
年六十有二娶施氏子男一人嗣亨孫男二人惟一習
舉子業惟讓尚幼是年十二月十五日葬於烏程縣三
碍鄉陳寧子塢先塋之次用治命也嗚呼君孝友儀於

家忠信行於州黨學不為詞章而究名理行不為厓異而趨平常是無愧於名齋且名處士者宜得書而銘之
銘曰

學以遵所聞孝行於厥家叶言確而人久行果而人趨
祿則不足慶有餘我銘其人後不誣

青門處士墓銘

予讀漢唐史至公孫述黃巢脅取隱士如李業周朴輩
至於餘毒渙而不免則慘至鼎鋸嗚呼隱者之生亂邦

幸而免於役官寺不幸卒為人所知乃致毒其身如此
不亦可哀已哉青門處士魏一愚氏非無任才冠杭者
亦不知訪其人矣而處士關 訖於市門卒溷而弗露

越四三年以病卒正寢卒後三月寇復至處士之廬與
堞舍同燬方諸述巢時隱人之不幸處士何幸哉是宜
錄其人書之不使與齊民同殆也處士性醇懿靜深恒
怕外撓閉置一身密屋中如處女然雖重客至不得面
周親謁請或一見即退平日危坐閱所蓄書幾萬卷然

無他制作味其旨而已其言行可為人勸者疏以示諸
子凡積為若干帙處士生某年死至正十六年正月七
日也男六人女三人其孤本仁持其友王謙狀來謁銘
予在杭時識其人遂為銘銘曰

世之否無全士疾以戕兵以死吁嗟青門如處子貌之
毀節之時卒完所歸木以止

木棺也
出左傳

挽辭附

蘇先生挽者辭叙

公諱大年字昌齡西澗其自號也世家廣陵性開爽亢直有碩學竒材不受公卿辟舉丰姿音吐文辭翰墨權謀智術皆絕出時輩至正癸巳兵興走徐州上大將策策天子聞而想見其人賞官編脩明年廣陵陷涉江隱吳市門又明年淮兵渡吳拜公市門起謔主句公擔一言捋砧鑽萬萬命定伯休兵公即冠竹服薜荔乞骸骨恣往還笠澤松陵間別號林屋洞主庚子春扁舟泛三泖入鶴城訪予草玄閣曰子閣誦十年起攫上第如券

取物奈鼠輩方擲偃月骰死爭得失子宜蹇且退又曰
竟疽疾肉潰腹背潰吾將與子狂酣偵蹈瞪光景焮之
耳癸卯秋予登天平石壁入城見公大堂公出妻子關

事按黎園舊部東為予留十日別明年託抱積山君
貽余文二百十言竒譎甚律諸古未知魁絕公者何如
耳定約遊大小雷七十二弁約未赴而公逝瀕終自著
墓誌文告其子曰吾年近七十無憾憾者缺靈武覲鎮
鉅龍山約喬宜中死擔耳鳴呼公夢矣九京不可作矣

死之後若干日與公約游成某陶某周某某相承祭於淞
之干將山杪各賦挽者辭予辭曰

飄飄蘇仙公浩氣凌八表游戲濁世來眼底古今了却

上食闕臺下視燕支沼遺書警世人翩若鶩鴻矯雙雷

蒼翠開清約隨空杪高樓舊時月照我夢皦皦見爾林

屋天屋天夜知曉

東維子集卷二十六